

خَطِ دَوْمِ يُوْحَنَّا

پيشگفتار

ای خط ره ام یوحنّا باچه زیدی نوشته کده. ای خط از طرفِ «بزرگِ جماعتِ ایماندارا بلده خاتونِ انتخاب شده و اولادای شی» نوشته شده و امکان دَره که مقصد شی جماعتِ ایماندارا و اعضای شی بشه. دَ امزی خطِ یوحنّا از اهمیّتِ مُحَبَّتِ نوشته مونه و تاکید مونه که ایماندارای مسیح یگدیگه خوره مُحَبَّتِ کنه. امچنان دَ باره معلّمای دروغی که مَوگیه مسیح باچه خُدا نییه خبردار مونه.

فهرستِ عنوانها

دُعا و سلام (آیه ۱-۳)

تشویقِ یوحنّا بلده مُحَبَّتِ کدو (۴-۶)

خبردار کدو دَ باره چلباز و دَجال (۷-۱۱)

سلامِ آخِرِی (۱۲-۱۳)

از طرف بزرگِ جماعت، بلده خاتونِ انتخاب شده و اولادای
 شی که ما اونا ره د راستی دوست دَرُم، نه تنها ما، بلکه پگ
 کسای که حقیقت ره میدنه،^۲ بخاطرِ حقیقتی که دز مو وجود
 دره و تا ابد ام قد ازمو مومنه.^۳ فیض، رحمت و سلامتی از
 طرفِ خدا یعنی آته آسمانی و از طرفِ عیسیٰ مسیح باچه آته
 آسمانی، د راستی و مُحَبَّتِ قد ازمو وجود میدشته بشه.

تشویقِ یوحنا بلده مُحَبَّتِ کدو

ما غدر خوشحال شدم ازی که بعضی بچکیچای تو ره پیدا
 کدم که د راهِ حقیقت قدم میزنه، امو رقم که آته آسمانی دز مو
 حکم کده.^۴ و آلی آی خاتو، از تو یگ خواهش دَرُم؛ اوطور نییه
 که دز تو یگ حکمِ نو نوشته موم، بلکه امو آسته که از اول
 دشتی، خواهش مه امی آسته که یگدیگه خو ره مُحَبَّتِ کنی.
 و مُحَبَّتِ ای آسته که مو د مطابقِ احکامِ ازو رفتار کنی.^۶
 اینمی حکمِ ازو آسته، امو رقم که شمو از اول شنیدید تا د
 مطابقِ ازو رفتار کنید.

خبردار کدو د باره چلباز و دجال

^۷ چُون چَلبازای غَدَر دَ دُنیا بُر شُدِه که اِقرار نَمُونِه که عیسیٰ
مسیح دَ جِسْم ظاهر شُد. امی رقم آدما، چَلباز و دجال آستِه.
^۸ خود ره هُوش کُنید تا اَمو چیزای ره که بلده شی زحمت
کشیدید از دِسْت نَدید، بلکه اَجْرِ کَامِل شی ره دَ دِسْت بیرید.
^۹ هر کسی که دَ تَعْلیمِ مَسیح ثابتِ قَدَم نَمُونِه و ازو دُور موره،
خُدا قد ازو نییه. لیکن هر کسی که دَ تَعْلیمِ مَسیح ثابتِ قَدَم
مُومنه، ام آته و ام باچه قد ازو آسته. ^{۱۰} اگه یگو کس دَ پیش
شُمو مییه و امی تَعْلیمِ ره نَمیره، ازو دَ خانِه خُو پذیرایی نَکُنید
و قد ازو خوش اَمَد نَکُنید. ^{۱۱} چُون هر کسی که قد ازو خوش
اَمَد کُنه، دَ کارای بَدِ ازو شریک موشه.

سلامِ آخِرِی

^{۱۲} اگرچه غَدَر چیزا دَرُم که بلده شُمو نوشته کُنم، مگم ما
نمیخایم که قد سیاهی دَ رُوی قاغذ نوشته کُنم، بلکه اُمید دَرُم
که دَ پیش شُمو بییم و رُوی دَ رُوی قد شُمو توره بُوگم تا خوشی
مو کَامِل شُنه.

۱۳ بچکيچای خوارِ اِنْتِخابِ شُدِه تُو، تُو ره سلام مُوگيه.

سوال داريد؟ +1 807.700.6090

آزرگي © afghanbibles.org

Copyrighted material not for reprint/publishing purposes.